

**TEKS UCAPAN YAB PERDANA MENTERI: MAJLIS PERASMIAN  
KARNIVAL HARI PENJAJA DAN PENIAGA KECIL PERINGKAT  
KEBANGSAAN TAHUN 2024**

By : DATO' SERI ANWAR IBRAHIM

Date : 02/11/2024

---

**SESI PENERANGAN MENTERI BERHUBUNG**

**SIDANG KEMUNCAK TERGEMPAR NEGARA-NEGARA ARAB  
DAN ISLAM BERKENAAN ISU PALESTIN DI RIYADH, ARAB  
SAUDI PADA 11 NOVEMBER 2024**

Assalamualaikum warahmatullahi wabarakatuh dan Salam Sejahtera,

Tan Sri Yang di-Pertua,

1. Saya telah menerima jemputan dari YTM Raja Arab Saudi untuk menghadiri satu Sidang Kemuncak Bersama Tergempar Negara-Negara Arab dan Islam pada 11 November 2024 di Riyadh, Arab Saudi.

2. **Pada 18 September 2024, Perhimpunan Agung Pertubuhan Bangsa-Bangsa Bersatu (PBB) telah meluluskan satu Resolusi di 10th Emergency Special Session (ESS), Resolusi ES-10/24** di mana masyarakat antarabangsa menggesa penamatan pendudukan haram Israel di Wilayah Palestin Yang Diduduki (OPT) dalam tempoh 12 bulan, berlandaskan keputusan Mahkamah Keadilan Antarabangsa (ICJ) dan Majlis Keselamatan PBB; serta menuntut keadilan untuk rakyat Palestin.
3. Pelaksanaan Resolusi ES-10/24 perlu disegerakan memandangkan situasi di OPT semakin meruncing akibat serangan tanpa henti oleh rejim Zionis Israel. Menurut laporan baru mengenai Situasi di Palestin oleh Pelapor Khas PBB Francesca Albanese, tindakan kejam Zionis adalah satu tindakan genosid.
4. **Oleh yang demikian, kehadiran saya ke Sidang Kemuncak tergepar ini adalah untuk membawa mandat Dewan ini, iaitu untuk mengambil tindakan bagi menghentikan kekejaman berterusan Israel ke atas rakyat Palestin; pencerobohan dan pemusnahan pusat-pusat ibadah di Wilayah Palestin Yang Diduduki (OPT); serangan terbuka ke atas wilayah-wilayah di Lubnan; dan Iran, termasuk pembunuhan Ismail Haniyeh dan Yahya Sinwar.**
5. Selain itu juga, persidangan ini akan membincangkan permasalahan semasa yang dihadapi oleh Agensi Bantuan dan Kerja Pertubuhan Bangsa-Bangsa Bersatu (PBB) Untuk Pelarian Palestin di Asia Barat

(United Nations Relief and Works Agency for Palestine Refugees in the Near East – UNRWA), berikutan keputusan rejim Israel mengharamkan operasi pertubuhan bantuan kemanusiaan tersebut pada 28 Oktober 2024 baru-baru ini.

## **CADANGAN TINDAKAN MALAYSIA DI SIDANG KEMUNCAK TERGEMPAR**

6. Adalah penting bagi Malaysia dan komuniti antarabangsa mengutuk jenayah genosid di Palestin, memberi tekanan ke atas Israel untuk melaksanakan gencatan senjata dengan segera bagi membolehkan bantuan ubat, makanan dan keperluan kemanusiaan lain dihulurkan kepada rakyat Palestin.
7. Untuk menggerakkan Special Committee against Apartheid di PBB ke atas Israel.
8. Malaysia akan mengusulkan ke Persidangan Kemuncak Negara-Negara Arab dan Islam agar sokongan sepenuhnya diberikan kepada UNRWA dalam melaksanakan mandatnya dalam memberi perkhidmatan sosial dan bantuan kemanusiaan kepada rakyat Palestin di OPT dipertahankan dan diperkukuhkan.
9. Malaysia berhasrat menggunakan Sidang Kemuncak ini untuk meraih sokongan negara-negara Arab dan Islam terhadap inisiatif tersebut dan menghalang pelaksanaan keputusan Parlimen Israel (Knesset)

pada 28 Oktober 2024 lalu, yang bertujuan melenyapkan UNRWA dan memburukan situasi kemanusiaan di utara Gaza yang mengalami kebuluran setelah terputus bantuan asas sejak sekian lama.

10. Salah satu pendekatan yang boleh diambil adalah bagi Sidang Kemuncak Negara-Negara Arab dan Islam memberi sokongan kepada usaha mediasi gencatan senjata oleh Amerika Syarikat, Mesir, dan Qatar. Sejak Mei lepas, ketiga-tiga negara ini telah membangunkan satu kerangka perjanjian yang perlu dipersetujui oleh semua pihak yang terlibat.
11. Penyertaan Malaysia sebagai ahli Perikatan Global juga sebahagian usaha untuk meningkatkan tekanan diplomatik ke atas Israel bagi melaksanakan gencatan senjata kekal di Gaza, menggesa pembebasan tahanan Palestin dan menangani penderitaan rakyat Palestin menerusi penyambungan segera bantuan kemanusiaan.
12. Seterusnya membincangkan pembangunan Pelan Tindakan dan mengenal pasti langkah-langkah konkrit ke arah mencapai kemerdekaan Negara Palestin dalam tempoh garis masa yang munasabah dan jelas.
13. Sebagai sebuah negara yang mendukung prinsip keadilan dan perundangan antarabangsa, Malaysia komited dalam memperjuangkan hak Palestin sebagai sebuah negara berdaulat dan merdeka, menerusi dialog, kerjasama, dan penyelesaian yang adil.

Malaysia berpandangan pendekatan ini adalah penting ke arah mencapai kestabilan dan keamanan kekal di Timur Tengah.

**AGENSI BANTUAN DAN KERJA UNTUK PELARIAN PALESTIN  
DI ASIA BARAT (UNITED NATIONS RELIEF AND WORKS  
AGENCY FOR PALESTINE REFUGEES IN THE NEAR EAST –  
UNRWA)**

14. Rentetan perkembangan ini, pada 31 Oktober 2024, Malaysia telah menyertai Kumpulan Teras (Core Group), bagi penyediaan satu draf resolusi Perhimpunan Agung PBB memohon Pendapat Nasihat (Advisory Opinion) Mahkamah Keadilan Antarabangsa (ICJ) mengenai obligasi Israel dalam membenarkan aktiviti dan kehadiran PBB, agensi-agensi di bawah PBB, organisasi-organisasi antarabangsa dan negara ketiga di Wilayah Pendudukan Palestin (OPT) yang dilaksanakan dengan persetujuan Kerajaan Palestin untuk manfaat orang awam Palestin di Wilayah itu.
  
15. Draf resolusi ini sedang dalam proses rundingan dan dijangka akan dibentangkan di Perhimpunan Agung PBB untuk kelulusan dalam masa terdekat. Setelah diluluskan kelak, resolusi tersebut dijangkakan menjadi landasan perundangan bagi membolehkan UNRWA terus memberikan khidmat asas seperti pendidikan, perawatan kesihatan dan bantuan kemanusiaan, yang telah memberikan faedah kepada lebih 6 juta pelarian Palestin di Gaza, Tebing Barat, Jordan, Lubnan dan Syria.

16. There is no alternative to UNRWA, dengan izin Tan Sri Yang di-Pertua, adalah kenyataan daripada 15 ketua agensi PBB dan organisasi kemanusiaan. Selama 75 tahun UNRWA merupakan tali hayat utama penyaluran bantuan antarabangsa kepada rakyat Palestin. Peranan penting UNRWA di Palestin juga disokong penuh Malaysia, di mana sejumlah USD 1 juta telah disumbangkan kepada UNRWA bagi tempoh tahun 2021 hingga 2025, iaitu sebanyak USD 200,000 setiap tahun.
17. Berikutan konflik yang memuncak sejak Oktober 2023, Malaysia juga telah menyumbang bantuan kewangan tambahan berjumlah USD 5.2 juta kepada UNRWA untuk meringankan beban dan membantu mangsa-mangsa kekejaman Israel. Walau bagaimanapun, kedudukan kewangan UNRWA masih berada dalam keadaan defisit sebanyak USD 80 juta.
18. Sokongan berterusan Malaysia terhadap UNRWA mendapat penghargaan daripada Encik Philippe Lazzarini Pesuruhjaya Agung UNRWA, yang telah dizahirkan kepada YB Menteri Luar Negeri semasa Perhimpunan Agung Pertubuhan Bangsa-Bangsa Bersatu Ke-79 yang lalu. Beliau turut memohon agar Malaysia membantu Agensi tersebut meraih sokongan Negara-Negara Sepemikiran mempertahankan dan memperkasakan mandat dan kebolehupayaannya untuk terus memberi perkhidmatan kepada rakyat Palestin.

## **PERKEMBANGAN SEMASA KONFLIK ISRAEL-PALESTIN**

19. Sudah setahun, Israel melaksanakan genosid di bumi Gaza. Sehingga 1 November 2024, konflik di Gaza telah mengorbankan 43,204 orang rakyat Palestin (termasuk 16,500 kanak-kanak), dan 1,200 rakyat Israel. 101,641 orang rakyat Palestin dilaporkan cedera, manakala 11,000 orang lagi dilaporkan hilang. Secara purata 118 rakyat Palestin terkorban dan 277 lagi cedera setiap hari sejak Oktober 2023.
  
20. Situasi Gaza malangnya terus meruncing dan seperti mana saya tegaskan kerana keganasan itu tanpa henti with impunity dengan izin dan dengan dukungan langsung dan tidak langsung dari negara-negara sekutu Israel.

Tan Sri Yang di-Pertua,

21. Keterangan terperinci boleh saya edarkan, tapi untuk membolehkan rakyat mengikuti perkembangan, saya telah memilih untuk memberikan penjelasan ringkas dan pendirian Malaysia yang akan kita bentangkan untuk pertimbangan negara-negara Islam dan Arab di Riyadh. insha allah kepada 11 hari bulan ini. terima kasih. terima kasih.

**Soalan daripada YB Tuan Ahmad Tarmizi Sulaiman, Ahli Parlimen Sik**

Minta YAB Perdana Menteri menyatakan:

1. Mengumumkan jumlah yang akan diberikan kepada Tabung UNRWA;
2. Meminta Kerajaan membuat keputusan tegas dan menyemak kembali penjualan saham MAHB kepada GIP, Blackrock;
3. Menjelaskan bagaimana operasi Ops Ihsan, adakah operasi ini akan diteruskan jika sempadan ditutup atau disekat; dan
4. Malaysia tidak boleh lagi menyatakan mengenai penyelesaian two state solution kerana penyelesaian itu tidak diendahkan oleh Israel, dan menyatakan pembebasan mutlak kepada Palestin adalah hak rakyat Palestin.

**Soalan daripada YB Tuan Syed Ibrahim bin Syed Noh, Ahli Parlimen Ledang**

Minta YAB Perdana Menteri menyatakan:

1. Menyuarakan cadangan kepada Pertubuhan Bangsa-Bangsa Bersatu (PBB) untuk menyekat penggunaan dana untuk tujuan membekal senjata kepada Israel;
2. Apakah tindakan Malaysia untuk mendapatkan kesepakatan serantau di Asia Tenggara untuk isu Palestin;
3. Apakah tindakan Malaysia untuk terus menyalurkan bantuan kepada rakyat Palestin walaupun mempunyai pelbagai sekatan;

4. Adakah Malaysia akan menghantar tentera pengaman untuk memberikan desakan kepada Israel dan perlindungan kepada rakyat Palestin.

**Jawapan YAB Perdana Menteri:**

1. Terima kasih Yang Berhormat Sik dan Yang Berhormat Ledang yang memberikan kerjasama dan penerangan yang akan membantu usaha Kerajaan dan pendirian saya di Riyadh nanti. Insha-Allah.
2. Setahun berlalu kenyataan-kenyataan keras telah dilakukan dan kalau setakat Malaysia seperti Yang Dipertua tahu berdepan dengan Presiden Amerika Syarikat atau Perdana Menteri Jepun atau Canselor Jerman dan ini bukan perkara yang mudah. Kerana kita mengambil kira pertimbangan kepentingan pelaburan, pekerjaan rakyat. Tapi untuk isu kemanusiaan dan menentang kezaliman, penjajahan, kita tetap berdiri teguh, berprinsip sehingga juga ada sedikit kerugian. Umpamanya bila kita putuskan untuk membatalkan semua pendaratan kapal ZIM ke Malaysia yang diizinkan sebelumnya. Tetapi saya ingin memberi jaminan bahawa Negara sebagai negara bebas dan merdeka, berdaulat dan kita punyai prinsip dan pendirian menegakkan keadilan di mana jua. Hal ini tidak boleh dipertikai. Kita akan terus dengan lebih tegas.
3. Soalan ditanya oleh YB Sik dan YB Ledang tentang dukungan kepada UNRWA. Dukungan kemanusiaan dari segi bantuan wang tunai itu lebih RM100 juta telah dimaklum sebelum ini. Atas usaha Menteri

Pertahanan, Menteri Luar Negeri kita telah bawa pesakit-pesakit parah, anak-anak terutama dari Gaza untuk dirawat di Hospital Tentera.

4. Dan ini akan diteruskan khusus untuk UNRWA. Setakat ini, dana yang telah diperuntukkan dan diserahkan kepada UNRWA adalah RM25 juta. Dan kita sedang berbincang bawah Kementerian Luar Negeri dan UNRWA untuk melihat keperluan menyegerakan.
5. Di samping itu, pertanyaan tentang bantuan kemanusiaan seterusnya dalam keadaan sekatan-sekatan, kita terpaksa bergantung utamanya dengan Kerajaan Mesir dan keduanya dengan Qatar dan Emiriah Arab Bersatu (UAE). Saya akan berunding dengan Presiden Abdul Fattah El-Sisi, Mesir pada 10 hari bulan, pertama mengucapkan terima kasih kerana Mesir beri laluan khas kepada usaha bantuan kemanusiaan Malaysia ke Arafah tetapi sekarang dihalang oleh Israel. Maka bantuan badan risikan dan juga Kerajaan Mesir sangat kritikal. Setakat ini kita tidak hadapi apa-apa masalah dengan Kerajaan Mesir atas kerjasama yang diberikan oleh Presiden. Namun, hal ini harus dijadikan satu strategi utama terutama negara Arab yang berjiran kerana pendirian mereka itu akan menentukan sama ada bantuan itu lebih berkesan atau tidak.
6. Saya setuju dengan gesaan kedua-dua Ahli Parlimen. Sebenarnya yang dicadangkan itulah pembebasan mutlak. Tidak ada negara di dunia yang harus mengizinkan penjajahan. Apa yang berlaku di tebing barat Gaza wilayah Palestin ini adalah penjajahan dan negara Israel itu hanya ditubuh pada tahun 1948, itupun atas gesaan

kerajaan Inggeris dan sikap concerns Jerman dan Eropah kerana apa yang mereka lakukan terhadap orang Yahudi dan negara mereka.

7. Kita semua maklum, pendirian Malaysia ini terikat dengan secara pragmatic apa yang boleh dilakukan kita boleh tuntutan apa sahaja. Tetapi pendirian kita mestilah secara konsensus berunding sekurang-kurangnya di negeri-negeri Arab, negeri Islam dan ruang yang ada dalam PBB. Sebab itu, pendirian kita masih tidak berganjak dari pembebasan mutlak. Langkah awal yang disebut ialah Two-State Solution. Ini tentunya tidak dipersetujui oleh ramai. Saya faham. Termasuk pendirian Hamas pada peringkat awal. Tapi kita juga harus tahu bahawa Liga Arab telah buat keputusan bersama Qatar, Mesir dan kemudian Amerika Syarikat. Dan Hamas bersetuju sebagai langkah awal tentang pendirian yang sama.
  
8. Tapi seperti mana disebut oleh kedua-dua Yang Berhormat tadi yang menentang keras apa sahaja pengiktirafan. Apakah ianya Two State? One State? menentang keras kehadiran orang Palestin, itu adalah Israel. Sebab itu kita sebagai satu negara agak bingung. Negara, negara bicara soal demokrasi, hak asasi, keadilan, negara-negara yang berjuang berhempas pulas menentang kezaliman dan penjajahan masih beri ruang kepada penjajah baru, kezaliman baru, apartheid baru dan genoside dan ini bagi saya yang harus disuarakan. Soal penyelesaian itu tentunya akan dirangka oleh rakyat Palestin sendiri bersama dengan rakan-rakan mereka dengan negara jiran. Jadi itu setakat pendirian kita yang munasabah peringkat ini yang kita boleh lakukan.

9. Ada yang mencadangkan tentang kedudukan kita dalam hal syarikat-syarikat.

Tan Sri Yang Dipertua,

10. Pendirian Malaysia tegas tidak banyak di negara-negara di dunia ini mengambil keputusan seperti Malaysia lakukan. Janganlah menggesa kita buat lebih daripada itu kerana semasa rakan-rakan sebagaimana Yang Berhormat Sik tahu, mereka dalam pemerintahan pun mereka tidak lakukan begitu. Malah mereka mengizinkan ZIM berlabuh. Kita tidak mengizinkan, jadi kita ambil langkah lebih daripada itu. Cuma sekarang ini ada bangkitkan soal syarikat-syarikat, puluhan malah ratusan syarikat yang ada kerjasama dagangan dengan Israel. Yang berdagang dengan semua negara termasuk Malaysia dan di semua negeri termasuk negeri-negeri yang diperintah oleh pembangkang. Jadi kita kena ambil keputusan yang agak konsisten. Apakah keputusan kita ini melibatkan bantahan terhadap negara kerana penjualan itu dengan izin negara. Tidak ada penjualan kelengkapan tentera. Kelengkapan ketenteraan yang tidak yang boleh berlaku tanpa izin negara.
11. Baik, ini yang kita buat setakat yang kita lakukan, saya harap Yang Berhormat faham ya, saya juga bertanggungjawab untuk menjaga bukan sahaja keamanan tetapi kepentingan rakyat dan Negara ini. Jadi janganlah kita kalau kita cadang, dia bukan satu syarikat. Saya nak sebut di sini. Kalau nak jadikan ini hujah kita boleh sediakan ruang di Parlimen. Beberapa puluhan syarikat-syarikat bertapak di semua negeri di Malaysia ini yang mempunyai kaitan secara langsung

atau tidak langsung termasuk sama ada kelengkapan atau parts atau saham senjata dan syarikat yang ada kepentingan dengan Israel.

12. Jadi keputusan itu harus keputusan yang tidak hanya retorik untuk menarik perhatian orang ramai. Ya kerana dari segi ketegasan saya bukan hendak astagfirullahalazim, bukan nak takabbur, saya telah mengambil langkah yang melampaui kesanggupan banyak negara-negara. Ya, dan ramai rakan-rakan daripada negara-negara yang mengingatkan saya tentang risiko ini.
13. Pagi tadi saya berbincang dengan Menteri Luar Negeri tentang kenyataan-kenyataan kita dan bagaimana menangani supaya Malaysia terjejas? Kalau saudara baca buku-buku terakhir tentang peranan beberapa negara termasuk Amerika Syarikat, berapa pemerintahan yang mereka gulingkan? kerana pendirian yang tegas yang mereka anggap bertentangan dengan sikap dan pendirian mereka ini. Ini risiko yang saya fikirkan, saya tidak ketepikan, tapi yang saya mohon dalam hal ini, saya terima kasih kepada Yang Berhormat Sik dan Ledang dan ada kesan pakatan, kita bawa mesej ini dulu dan kita lihat beberapa kekuatan, kita runding dengan tegas.
14. Sebab itu di Mesir, insya Allah petang ini ke negeri China tentu saya akan berterima kasih kerana kenyataan Presiden Xi Jinping di sidang BRICS di Kazan itu sangat tegas, sangat tegas, tegas Negara China. Saya akan berikan dukungan kita terhadap kenyataan dan gesaan supaya sesuatu yang lain tambahan dilakukan.

15. Saudara juga tahu tentang kehadiran kita di BRICS kerana sikap di negara selatan yang telah kuat bersuara sekarang, dia tidak lagi seperti dulu. Jadi strategi kita lebih baik membina kekuatan dalaman dan kekuatan bersama negara-negara sama ada Arab atau Islam atau Global South, negara-negara selatan yang punyai kekuatan, pada saya itu lebih realistik melihat kepada permasalahan dunia yang rencam dan rumit yang ada sekarang.
16. Saya faham tekanan yang diberikan dan saya tidak memperkecil kerana mungkin dari hasrat yang sungguh-sungguh kerana kita rasa resah dan sedih terhadap apa yang berlaku setiap hari ya belum pernah berlaku dalam sejarah moden apa yang dilakukan ke atas seorang rakyat Palestin. Maknanya orang-orang yang biadap dan gila sahaja bagi sayalah pendapat saya, jangan sebutlah soal demokrasi, hak asasi yang mampu lihat dan mengizinkan memberi hujah mempertahankan keadilan ini. Jadi bab ini saya ucap ribuan terima kasih tentang pendirian yang telah diberikan.
17. Saya hanya hendak ambil kesempatan yang akhir di sini iaitu tentang kedudukan rakan-rakan kita tentera Malaysia, MALBATT di Lubnan. Kita melalui Kementerian Pertahanan, Menteri Pertahanan berhubungan dengan petugas di sana hampir harian, melihat keberadaan mereka, keselamatan mereka. Tapi ini kita terikat dengan The United Nations Interim Force in Lebanon (UNIFIL) Pertubuhan Bangsa-Bangsa Bersatu. Dan setakat ini Duta Besar masih di Beirut, masih memantau keadaan dan ada giliran penukaran pasukan yang ada kepada pasukan baru kerana tamat tempoh, yang akan tiba di sini di sekitar 6 hingga 19 November dan kemudian penggantian kumpulan MALBATT yang lain.

18. Malaysia bersama-sama 33 buah negara yang lain adalah penyumbang anggota UNIFIL yang lain telah buat kenyataan bersama yang diterajui oleh Poland mengecam tindakan serangan Israel.

Tan Sri Yang Di-Pertua,

19. Negara kuasa besar pun dalam sejarah mutakhir tidak segila dan sekejap dan segi zalim Israel seperti yang berlaku sekarang. Jarang dalam sejarah kita lihat umpamanya sanggup mengeneipkan semua peraturan dunia, semua hukum dan undang-undang. Sehingga melibatkan risiko ke atas petugas-petugas PBB di Lubnan.
20. Sebab itu atas inisiatif Poland kita menyokong dan melakukan kenyataan bersama oleh 33 buah negara yang mengutuk serangan itu tetapi sementara itu tetap mempertahankan keperluan mengekalkan UNIFIL untuk keselamatan rantau yang bertelagah selama ini.
21. Jadi ini pendirian kita tentu ada yang menggesa supaya kita menarik pulang, tetapi pendirian kita adalah pendirian bersama dengan pasukan UNIFIL dan kita membuat keputusan bersama Malaysia, Indonesia dan pasukan Malaysia itu disertai oleh Brunei dan ini pendirian bersama yang kita ambil.
22. Sekali lagi saya ucap terima kasih kepada rakan-rakan semua ahli Yang Berhormat termasuk dua (2) jurucakap dan insha-Allah kita

akan lakukan sebaiknya. Assalamualaikum warahmatullahi wabaratuh. Terima kasih.

**TEKS UCAPAN**

**YAB DATO' SERI ANWAR BIN IBRAHIM**

**PERDANA MENTERI**

**SEMPENA**

**MAJLIS PERASMIAN**

**KARNIVAL HARI PENJAJA DAN PENIAGA KECIL PERINGKAT  
KEBANGSAAN TAHUN 2024**

**2 NOVEMBER 2024 (SABTU) | 11.00 PAGI**

**PICCA CONVENTION CENTRE,**

**BUTTERWORTH ARENA, PULAU PINANG**

*Assalamualaikum warahmatullahi wabarakatuh dan Salam Sejahtera.*

*Alhamdulillahil lazeee anzala 'alaa 'abdihil kitaaba,*

*wa lam yaj'al lahoo 'iwajaa,*

*Wa Nusalli Ala Rasoolilah Kareem,*

*Wa 'ala alihi wasahbihi ajma'in.*

Saudara Menteri Pembangunan Usahawan dan Koperasi (KUSKOP),

YB Datuk Ewon Benedick;

Rakan rakan menteri yang hadir;

Ini tengok betapa pentingnya penjaja dan peniaga kecil, ramai menteri turut hadir di sini.

Timbalan Menteri;

Ketua Setiausaha Negara,

Tan Sri Shamsul Azri;

Rakan-rakan KSU;

Timbalan Ketua Menteri;

Exco;

Ahli Dewan Rakyat;

Ahli Dewan Undangan Negeri; dan

Rakan-rakan yang saya muliakan.

YBhg. Dato' Haji Zainal Abidin bin Dato' Haji Abd Majid, Presiden Gabungan Persatuan-Persatuan Penjaja dan Peniaga Kecil Melayu Malaysia dan seluruh panglima-panglima penjaja yang hadir.

Terima kasih.

1. Saya tambah gembira hari ini, tahun lalu kita di Penampang, Sabah. Tapi yang ini di Seberang Jaya, Permatang Pauh, saya jadi rasa macam tuan rumah pada hari ini.
2. Jadi Datuk Ewon bisik kalau tuan rumah tak kan tidak tambah peruntukan? jadi untuk hari penjaja-penjaja dan peniaga kecil memang peruntukan diberikan melalui peruntukan sedia ada kementerian.
3. Keduanya seperti mana yang disebut oleh Datuk Ewon Benedick dari **RM20 juta yang diperuntukkan, RM1 juta diberi kepada persatuan untuk perjalanan kegiatan mereka.** Tapi tidak ada peruntukan khas untuk Hari Penjaja kerana sebelum ini belum ada dasar penjaja peniaga kecil.
4. Jadi terima kasih kepada KSU Dato' Seri Khairul Dzaimie kerana sekarang mempersiapkan kerangka dasar penjaja, peniaga kecil yang akan kita luncurkan. Maknanya untuk tahun depan harus ada peruntukan khas untuk hari penjaja dan peniaga kecil. Untuk tahun ini, katanya sedikit sahaja, maka saya tambah RM250,000 untuk

majlis hari ini. Kerana menteri sebut pada saya dia kata cukup, cuma kurang sikit je kalau dia kata tidak cukup tadi RM50 juta pun saya lulus (nada seloroh).

5. Pertama saya hendak jelaskan, mengapa dasar kerajaan dasar MADANI ini menekankan soal rakyat di peringkat bawah dan kalau saudara-saudara lihat seluruh dasarnya penyasaran subsidi 85% tidak dikena, makna tidak ditarik subsidi.
6. Dalam ucapan-ucapan di Parlimen kita tarik subsidi, tarik hanya untuk 15% yang tertinggi. Itu pun kita hendak kaji lagi. Jangan beban pula T15 kalau pendapatan dia RM13,000, katanya rendah, kita tingkatkan lagi. Jadi sepatutnya orang politik dia patut bela 85% ini, penjaja, peniaga, petani, nelayan. Ini di Parlimen, dia berucap pertahankan golongan kaya dan maha kaya, bila masuk kampung kami pembela Melayu kampung, tidak betul. Tapi bila bercakap di Parlimen kami pembela golongan kaya.
7. Saudara, kita tidak tambah cukai kalau dari segi penyasaran subsidi, kita hanya tarik subsidi. Apa ada subsidi bantuan? bantuan untuk rakyat susah, subsidi ini umpama sedekah. Kita tarik sedekah. Dia bayar harga pasaran. Dulu kita buat elektrik, elektrik yang di dewan ini siapa tidak bayar, tidak naik peningkatan kerana subsidi tidak ditarik balik, yang ditarik balik hanya untuk golongan atas, berapa? air conditioning di rumah 7, fan 6 bayarlah sikit. Bukan bayar cukai tambahan, bayar ikut kadar pasaran, yang kita tarik itu subsidi.

8. Subsidi itu mana-mana negara ini sepatutnya untuk rakyat susah atau kelas menengah tapi yang didengar di bawah lain. Sebab itu saya hendak peniaga kecil dengan penjajah tolong jelaskan? dasar ini dasar bantu rakyat dari mana hendak dapat wang? Kalau negara ini orang kaya apa kita bayar? ada yang pendapatannya RM1 juta sebulan subsidi elektrik bagi, subsidi minyak bagi. Munasabah? tidak munasabah. Tidak masuk akal diteruskan. Jadi ini yang saya lakukan. Bila kita tarik subsidi daripada dia, barulah kita bantu penjaja dan peniaga.
9. Dato' Zainal kata okay bantu, dari mana saya hendak dapat wang, dari jimatkan belanja negara, jimat dari mana orang kaya janganlah bagi sedekah. Subsidi bagilah orang susah. Jadi saya hendak saudara faham hari ini. Begitu juga bila kita bincang penyasaran subsidi baru-baru ini. RON95, kita tidak naik bagi rakyat. 85% B40, M40 malah T20 pun, jadi tinggal 15 di atas. Itu pun kita kaji, kita bimbang takut bila dikenakan orang itu mungkin gaji RM13,000 pendapatan anak 5, 2 di universiti mungkin terbeban. Itu sedang dikaji supaya bila kita tarik subsidi jangan menyusahkan.
10. Tapi saya tengok di media, di media sosial parti-parti pembangkang riuh rendah bercakap ini tidak adil, nak adil bagaimanapun kepada rakyat. Kalau orang yang dapat pendapatan RM100,000 sebulan RM100,000 sebulan pun kita bagi subsidi. Jadi tolong faham yang ini sausara-saudara.
11. Baik berkaitan soal cukai, ada Ahli Parlimen termasuk Ahli Parlimen di sini yang kata ini kerajaan MADANI ini apa? cukai orang miskin,

orang kaya tidak bayar cukai, kamu mengaji ekonomi apa ni? kamu dengar kupasan Belanjawan. Kamu faham ke dasar, padahal cukai kita ini yang sekarang SST, penyasaran subsidi semua kita kenakan kepada orang kaya. Tapi bila bercakap di kampung, dengan Al-Quran dengan hadis, kemudian bagi kenyataan yang palsu.

12. Ada orang kata bila saya jawab dia kata mana boleh? Perdana Menteri jawab ini semua, jadi kerja Perdana Menteri apa? harus jelaskan, saya hendak saudara-saudara faham. Kalau tidak kita tidak boleh tadbir dengan adil.
13. Sekarang ini heboh pasal NAFAS. Itu terpulang pada siasatan. Tapi kita hendak pastikan yang dapat baja, benih ini dapat harga patut, yang import cara betul itu sahaja.
14. Saya sudah lama marah pada kartel ini. Kartel ini makna apa? maknanya kelompok kecil jaga dia, bukan jaga rakyat. Jadi kena faham mengapa siasatan dilakukan. Siapa saja tanpa kecuali, ada kes SPRM masuk. Kalau kes jenayah Polis Diraja masuk, tidak kira dia jabatan apa, pangkat apa. Syarikat Kerajaan ke syarikat swasta.
15. NAFAS, betul bebas, tapi di bawah penguasaan Menteri Pertanian dan Keterjaminan Makanan. Baru ini kes Khanazah. Itu khazanah pengerusi sekarang Perdana Menteri, tapi saya tidak halang siasatan, macam mana kes dulu, yang ini kes dulu. Tapi kalau kes sekarang pun ada sahaja laporan sama ada Perdana Menteri, pengerusi atau

tidak, kalau salah, siasat, kalau salah, dakwa, kalau salah hukum. Saya tidak peduli, baru kita boleh perintah dengan adil.

16. Jadi saya harap rakan-rakan terutama penjaja dan peniaga kecil tahu bagaimana saya nak bela. Rakan-rakan tahu gaji semua naik bagi pegawai-pegawai Kerajaan kerana apa? 12 tahun tidak naik, kerja lebih kuat, saya tegur lagi agar tegas tidak tolak ansur jadi bagilah yang adil kepada mereka.
17. Menteri dan Timbalan Menteri potong lagi 20 peratus, Perdana menteri tidak ambil gaji lagi, tetapi kata mana boleh tidak ambil gaji, malaikat ke kalau tidak ambil gaji. Tak ambil gaji pun kena marah. Saya bercakap dengan Wan Azizah geram-geram ambillah gaji tahun depan. Tengok hendak kata apa pula, 'haa dulu tidak mahu ambil gaji, sekarang ambil gaji pula, salah juga'. Ini apa punya perangai huduh sangat ni. Ya ini maknanya cemburu. Saya bukan miskin. Saya tidak ambil gaji saya tidak miskin, elaun ahli Parlimen saya ambil, Wan Azizah pun ada elaun Ahli Parlimen, cukuplah. Rumah ada Kerajaan bagi, naik kapal terbang Kerajaan, naik kereta Kerajaan, dah berjuang lama berkhidmatlah kepada rakyat. Ini yang saya nak lakukan pun kena maki lagi. Itu yang saya boleh sebut lawan tetap lawan.
18. Jadi saya nak jelaskan sebab mengapa saya berani bercakap depan penjaja dan peniaga? Kerana saya sungguh-sungguh. Tahun pertama semasa saya jaga Dewan Bandaraya Kuala Lumpur (DBKL), apa saya buat? nak suruh saya buat bangunan mercu tanda yang hebat? Tidak payah lagi dah. Jadi mereka kata tengok Perdana Menteri ini tidak

ada bangunan tinggi. Saya kata tidak perlu, kerana bandar raya Kuala Lumpur kita harus dikenali dengan kebersihan, dengan gerai, warung dan restoran kecil yang bersih dan indah. Itu keutamaan saya.

19. Hari ini banyak perubahan, 70 hingga 80 lebih peratusan yang sudah siap dan sekarang walaupun banyak dilakukan oleh DBKL, KPKT dan ini saya juga telah cadangkan kepada semua Kerajaan negeri. Apabila bercakap pasal kota, gedung-gedung besar, biar sektor swasta yang buat. Dia nak buat bangunan, nak buat hotel dia buat. Kerajaan tumpukan kepada gedung-gedung kecil, warung penjaja. Tidak malu ke, bukan main hebat di mana? Pulau Pinang, mana? Kuala Lumpur, mana? Johor bahru tetapi tengok gerai dan warung yang ramai orang kita makan, 80 peratus pergi ke warung. Tetapi warung nak roboh, lampu tidak menyala, tandas busuk, kotor dan pecah, apa itu kita bangga? Tidak. Sebab itu saya kena tumpu bidang itu. Bukan sahaja di Kuala Lumpur, saya pergi Kelantan.
20. Saya dengar Pasar Siti Khadijah puluhan tahun bumbung bocor, tandas rosak, lantai pecah. Saya pergi selepas menghadap Tuanku Sultan Kelantan, keperluan RM5.6 juta kita lulus masa itu juga. RM5.6 juta untuk bangunkan semula pasar. Sebab apa? Ada 2,800 penjaja dan peniaga kecil di situ. Itu yang daftar, yang tidak daftar kata mungkin ada lagi mungkin hampir 3,000 peniaga dan penjaja kecil kerana saya mahu Kota Bharu terkenal juga dengan gerai, warung dan pasar yang bersih. Jadi ini dasar kita. Ini baru MADANI, ini baru manusiawi, ini baru Karamah Insaniah.

21. Saudara-saudara, saya tidak tolak ansur, rakan-rakan Jemaah Menteri ada, Ketua Setiausaha Negara ada dalam mesyuarat, hal ini kita beri tumpuan sebab itu Kementerian Pembangunan Usahawan Dan Koperasi (KUSKOP) di bawah saudara YB Datuk Ewon Benedick dan Ketua Setiausaha, kita bagi keutamaan, kita bagi peruntukan dan kita bagi gesaan supaya ada dasar dan turun ke bawah dan bantu rakyat di peringkat bawah dan terima kasih saudara YB Datuk Ewon Benedick.
  
22. Kemudian dicadang pula gerai dan warung ini di Kota. Bagaimana dengan pekan kecil sebab tidak masuk bawah Majlis Perbandaran. Kalau di Pulau Pinang masuk dua-dua tetapi di kebanyakan negeri, negeri lain di Sabah, di Sarawak, di Pahang, Kelantan, pekan-pekan kecil tidak masuk di bawah Majlis Perbandaran, bukan di bawah Kementerian Perumahan Dan Kerajaan Tempatan (KPKT). Jadi projek-projek tidak sampai.
  
23. Itulah sebabnya mengapa kita tambah peruntukan dan disebut Tamu Desa MADANI di kawasan-kawasan yang di dalam sikit supaya diberikan perhatian kepada peniaga dan penjaja kecil yang di luar bandar. Yang itu kita luluskan. Dalam Belanjawan kita lulus tambahan RM100 juta yang dibahagikan kepada kementerian-kementerian dan saya akan perhatikan sepertiman yang disebut oleh Menteri bahawa sebahagian peruntukan itu sampai kepada KUSKOP dan diuruskan supaya bantu penjaja dan peniaga kecil termasuk persatuan.

24. Saudara-saudara, yang saya sebutkan ini penting, kena faham ya kerana kalau kita kata restoran, restoran 5 bintang ada, siapa ada duit pergi lah ke sana. Restoran-restoran ada, tetapi kalau kita tengok, contohnya di Seberang Jaya, yang mengguna atau yang sampai ke warung atau restoran kecil, peniaga kecil beli belah ini lebih banyak rakyat terbanyak, lebih ramai rakyat ke warung, kedai-kedai kecil sama ada kedai makan atau beli belah itu lebih ramai berbanding atau ketimbang restoran-restoran besar, sebab itu peruntukan kita pun harus adil. Kita bagi perhatian kerana majoriti rakyat. Sebab itu saya tekankan di bandaraya, beri perhatian yang lebih oleh Dewan Bandaraya kerana warung-warung itu memalukan sebelum ini. Sebab saya kata 80 peratus rakyat pergi ke situ, yang peringkat atas ke restoran-restoran besar.
  
25. Sebab tu kalau saudara tengok, lihat pengalaman saya setiap hari Jumaat, sebelum solat Jumaat, saya sampai ke gerai atau warung atau restoran kecil dan makan dahulu sebelum tunai solat Jumaat. Supaya orang tidak kata bahawa Perdana Menteri ini dekat pilihan raya baru nak dukung anak, baru nak pergi jumpa orang miskin, baru nak pergi gerai sebelum pilihan raya. Saya tidak. Setiap minggu hari Jumaat saya ke warung dahulu, peniaga kecil dahulu, sebelum sampai ke Masjid. Di situ banyaklah complaint, harga gula lah, beras tidak cukup lah ataupun bumbung bocor, ataupun lantai tidak bagus. Jadi kita tengok dan lihat sendiri, kita santuni dan faham masalah rakyat.
  
26. Dan ini gesaan kita kepada pemimpin-pemimpin, mesti turun kerana siapalah hendak lihat peniaga kecil ini, tak ada masa kerana ekonomi kita sedang rancak. Kita ada pelaburan berbilion masuk. Baru-baru

ini AWS, Google, Microsoft, NVIDIA dan Infineon, ini yang besar-besar, puluh billion pelaburan masuk. Betul, kita kena bagi perhatian, tetapi jangan lupa bahawa pembangunan ini mesti lebih merata, mesti ada pengagihan. Yang golongan atas, pelaburan kita perlu untuk jamin pekerjaan tetapi di sebelah kilang-kilang besar perbelanjaan berbilion, perlu juga ada warung-warung dan pusat peniaga kecil kerana yang bekerja itu bukan semua pengurusan besar.

27. Apabila Google Chief datang ke Kuala Lumpur, saya makan dengan dia. Saya cerita bab ini. Dia kata bila Google datang, pelaburan RM10 bilion ringgit. Dia bayar gaji jurutera dan pengurusan semua tinggi tetapi saya kata 70 peratus ini di bawah, pekerja kilang dan sebagainya. Mereka tidak akan pergi makan ke restoran besar. Mereka akan pergi beli belah di pusat-pusat peniaga kecil dan makan di gerai dan warung.
28. Dan inilah sebabnya mengapa kita harus beri perhatian dan sediakan tempat perniagaan yang selesa di kawasan perindustrian dan kawasan perumahan. Ini dasar Kerajaan yang ada sekarang dan saya percaya untuk maksud ini walaupun kementerian-kementerian lain juga terlibat, agensi pun ada sama, ada PERKESO, juga saya tengok ada penyelarasan dengan persatuan dan cadangan persatuan dan koperasi, saya setuju saya minta selaras dengan ANGKASA supaya jangan bertindih. ANGKASA sudah ada pusat-pusat pengedaran hampir setiap daerah. Jadi persatuan penjaja dan peniaga kecil harus ada operasi yang boleh bergabung supaya dikurangkan kos pengurusan dan pentadbiran.

29. Saya tidak mahu umpamanya bagi berjuta ringgit, kos tinggi. Ini macam saya kritik dahulu mula-mula RISDA. Apakah itu RISDA? Pekebun kecil getah. Pusat bantu pekebun kecil getah dan apa tumpuannya yang pertama? Buat gedung besar di Kuala Lumpur. Saya tidak fikir ini bukan satu pendekatan yang sesuai. Itu dulu cerita dulu tetapi saya nak beritahu pengalaman ini harus kita pelajari. Dan sebab itu kita kena lihat umpamanya badan-badan Kerajaan, syarikat-syarikat besar seperti TNB, PETRONAS, bank dan bawah Khazanah Nasional, PNB yang keseluruhannya itu sampai dah RM1 trilion ringgit. Saya bagi peringatan kepada mereka mesti ada program-program menyantuni rakyat di peringkat paling bawah, juga akan kita selaraskan.
30. Sekali lagi saya nak ucap terima kasih kepada Menteri dan seluruh keluarga KUSKOP dan semua rakan-rakan terutama penjaja dan peniaga kecil dari seluruh Malaysia yang datang ke sini hari ini. Soal peruntukan saya cakap saya tidak bimbang, yang penting kerja dan kerja jangan bocor, jangan tiris, jangan sakau insya-Allah negara ini akan diberkati Allah SWT dan peruntukan akan bertambah dan melimpah tahun demi tahun.

Wassalamualaikum Warahmatullahi Wabarakatuh.

### **Copyright of the Prime Minister's Office Official Website**

Source: <https://www.pmo.gov.my/2024/11/teks-ucapan-yab-perdana-menteri-majlis-perasmian-karnival-hari-penjaja-dan-peniaga-kecil-peringkat-kebangsaan-tahun-2024/>